

## Ang Dakung Lunop sa Dalan sa Kinabuhi

**KATUYOAN :** Sa pagpakita sa kasigurohan sa mga magtotoo diha kang Cristo.

Nahiagum na ba ikaw sa baha? Dinhi sa Pilipinas atong nadunggan nga adunay bagyo, uban sa kusog nga ulan nga maoy hinungdan sa mga baha. Unsa kapait nga kasinatian ang nahiaguman niadtong mga nakaagi og baha.

Sa miagi nato nga pagtulon-an atong nakaplagan nga ang mga paagi sa Dios kanunay magapaibabaw. Karon atong makita nga ang alagianan sa Ginoo anaa ibabaw sa dagkung mga tubig. Saimo 77:19. Usahay ang mga alagianan sa Ginoo nagakabalhin, busa kinahanglan nga kita magapaduol gayud kaniya ug sa iyang pulong sa moabut na kita sa mga likoanan sa **DALAN SA KINABUHI**.

Adunay alawiton nga nagaingon, "Ang uban nagalatas sa tubig ang uban nagalatas sa dagku nga kagulan apan silang tanan nahinloan pinaagi sa dugo." Karon moadto kita sa sugilanon sa Dakung Lunop.

Human si Henoch gilalin, ang mga katawhan misamot kadautan. Si Satanas nagkugi kaayo pagmando sa mga tawo diha sa iyang dalan ug nangingkamot nga sila mahilayo sa Dios aron ang gisaad nga Manluluwas dili moabut sumala sa gisaad nga nabasa sa Genesis 3:15. Ang maayo ug dautan nagakasagol ug kanunay lamang nga nagahari ang pagkadautan.

Miingon ang Dios, "Pagalaglagon Ko gikan sa nawong sa yuta ang tawo nga Akong gibuhat." Genesis 6:7

Apan bisan pa taliwala sa naghitak nga kasal-anan dihay usa ka tawo nga naglakaw uban sa Ginoo, ang iyang ngalan mao si Noe. Wala siya mangasawa sa mga dautan nga kaliwatan bisan pa ang iyang mga anak. Nagiakaw siya diha sa pagtoo ug nakaplagan niya ang Grasya sa Dios. Genesis 6:8

Tungod kay si Noe matarung nga tawo busa ang Dios nagsugo kaniya sa pagbuhat ug arka. Genesis 6:12-21

Si Noe nagtuman sa giingon sa Ginoo bisan tuod siya wala makakita ug ulan o baha. Sumala sa Genesis 2:6, ang gabon o yamog mao ang gigamit aron magbubo sa tibook nawong sa yuta. Hunahunaa lamang si Noe, tawo nga tigulang na ug may pangidaron na nga 600 ka tuig, magbuhat ug barko halayo sa tubig ug magawali niadtong tanan nga mga dautan nga mga katawhan samtang magahimo siya sa arka. Tingali bisan pa ang mga panday nga mitabang kaniya nagbugalbugal sa iyang pagpahimangno nga adunay moabut nga lunop kay wala man gayud sila makasinati ug ulan.

Sa katapusan nahuman ra gayud ang arka ug ang Ginoo miingon kang Noe, "Sumulod ka ug ang tibook mong pamilya sa arka." Sabta ang giingon sa Ginoo, "Sumulod ka." Kini nagapasabut nga Siya nagauna sa sulod. Ug dayon gisirhar sila sa Dios diha sa sulod. Genesis

7:16. Ang pultahan maayo gayud nga pagkatak-op ug si Noe ug ang iyang panimalay maayo nga pagkahimutang sa sulod. Ug miabot ang lunop. Genesis 7:17-24. Ug ang Dios nahinumdom kang Noe. Genesis 8:1-14. Ang tanan nga didto sa gawas sa arka nangalaglag, ang tanan nga walay kaalam ug dunay kaalam. Apan ang tanan nga didto sa sulod sa arka walay kadaut, gikan sa labing gamay hangtud sa labing daku. Ang arka nagalutawlutaw ibabaw sa mga tubig. Miulan sulod sa kap-atan ka adlaw ug gabii apan bisan usa ka tulo wala gayu'yusa nga misulod sa arka.

Mikabat gayud ug usa ka tuig gikan sa pag-ingon sa Dios, "Sumulod ka," miingon na usab Siya, "Gumawas ka." Genesis 8:16. Ang Dios mao ang una nga misulod ug labing ulahi usab nga minggawas. Unsa man ang gibuhay ni Noe sa didto na usab siya sa mamala nga yuta? Naghimo siya ug halaran ug misimba sa Dios. Hibalo nga wala niya simbaha ang arka. Genesis 8:20. Ang Dios naghatag sa bangaw ingon nga ilhanan nga dili na Niya pagalaglagon ang kalibutan pinaagi sa lunop. Genesis 9:9-17. Adunay mga baha nga miabot sa kanasuran niining kalibutana karon apan dili na gayud Niya pagalunopan ang tibook nga kalibutan sama sa iyang gibuhay sa panahon ni Noe.

Sa kahimutang ni Noe adunay mapupo nato nga panag-ingnan sa ginaingon sa Kasulatan nga **LUWAS** ug **DILI LUWAS**:

- 1) Kon nahigawas pa siya sa arka dili gayud siya maluwas, apan si Noe didto sa sulod sa arka busa siya naluwat.
- 2) Ang arka maoy naghulagway o nagsimbolo sa Ginoong Jesu-Cristo. Hinimo kini sa kahoy nga gopher ug gibulitan sa salong. Ang salong maoy nagapugong sa tubig ug nakapanalipod ni Noe.
- 3) Ang kahoy mihatag sa iyang kinabuhi aron mahimo ang arka. Si Cristo mihatag sa iyang lawas pinaagi sa kamatayan aron sa pagluwas kanato sa silot sa sala.
- 4) Adunay usa lamang ka pultahan diha sa kilid sa arka ug ang tanan kinahanglang moagi didto. Ang kilid ni Cristo gidughang aron ang tanan makasulod ngadto sa kinabuhing walay katapusan diha Kaniya.
- 5) Ang arka nabautismohan sa tubig sa paghukom ingon man usab si Cristo nabautismohan sa paghukom alang kanato. 1 Pedro 3:18-21

Ug ato nang nakita ang dakung lunop nga maoy nagalaglag sa mga dautan nga katawhan diha sa paghukom. Ang basahon nga iya sa Dios, ang Biblia, nagaingon nga aduna pay laing daku nga paghukom nga moabut. Siquro na ba ikaw diha kang Cristo karon? Si Jesu-Cristo nag-ingon: "Duol kamo Kanako ug panalipdan Ko kamo. Gihigugma Ko kamo busa hamatay Ako tungod sa ihuyong mga sala. Agakon Ko kamo diha sa **DALAN SA KINABUHI** ug panad-on Ko kamo sa Akong puloy-anan ug magpuyo kamo uban Kanako sa himaya hangtud sa kahangturan."

Si Jesu-Cristo mao ang Arka ug ang Pultahan. Nagaingon Siya, "Ako mao ang Pultahan; kon adunay mosulod agi Kanako, siya maluwas." Juan 10:9. Moduol ka ba Kaniya karon?

**SAG-ULOHON : Juan 10:9. Ako mao ang pultahan; kon adunay mosulod agi Kanako, siya maluwas; ug siya mosulod ug mogula ug makakaplag siya ug masibsib.**

## PAGTULON-AN 4 - PAGATUBAGON

Isulat diha sa blanko ang sumpay sa mga bersikulo:

1. Ug nakita ni Jehova ang \_\_\_\_\_ sa tawo sa yuta daku.  
Genesis 6:5
2. Ug miingon si Jehova, pagalaglagon ko \_\_\_\_\_ nga Akong gibuhat. Genesis 6:7
3. Apan si Noe nakakaplag \_\_\_\_\_ sa mga mata ni Jehova.  
Genesis 6:8
4. Si Noe maoy usa ka tawo nga \_\_\_\_\_ ug \_\_\_\_\_ sa iyang kaliwatan. Genesis 6:9
5. Miingon ang Dios, magbuhat ka ug \_\_\_\_\_ sa kahoy nga gopher.  
Genesis 6:14
6. Ang Dios nag-ingon kang Noe nga ang tanan nga mga mananap mga mahinlo kumoha ka ug \_\_\_\_\_ ug sa mga mananap nga mahugaw. \_\_\_\_\_  
Genesis 7:2,3
7. Ug ang nanagpanulod, mga lake ug baye sa tanan nga mga unod, ingon sa gisugo sa Dios kaniya; ug \_\_\_\_\_  
Genesis 7:16
8. Ug mitukod si Noe ug usa ka \_\_\_\_\_ ug mikuha siya sa tanan nga mananap nga mahinlo ug sa tanan nga langgam nga mahinlo ug mihatag siya ug mga \_\_\_\_\_  
Genesis 8:20
9. Ang mga pagpanghukom alang sa sala moabut dinhi sa kalibutan apan dili kita angay nga magakahadlok kon ang atong kinabuhi \_\_\_\_\_  
Mga Taga-Colosas 3:3
10. Dihay usa lamang ka pultahan sa arka diin si Noe ug ang pamilya miagi ngadto sa kasigurohan. Adunay usa lamang ka pultahan usab diin kita makasulod ngadto sa presensia sa Dios. Kana nga pultahan mao ang Ginoong Jesu-Cristo. Paghimo og hulagway sa usa ka pultahan ug tupad niani isulat ang Juan 10:9 nga sinag-ulo.

---

---

---

---

---